

08/02/1998

Kelantan yakin ahli terima nasihat PM

KOTA BHARU: Ahli Umno di peringkat akar umbi sudah mula memahami dan menerima nasihat Presiden parti, Datuk Seri Dr Mahathir Mohamad, berhubung saranan tiada pertandingan bagi jawatan ketua bahagian dalam pemilihan 12 hingga 29 Mac ini.

Ahli Majlis Tertinggi (MT) Umno, Datuk Mustapa Mohamad, berkata kekeliruan yang timbul sebelum ini adalah berikutan tiada pihak tampil dan memberi penjelasan mengenai kedudukan sebenar berhubung perkara itu.

"Mereka (peringkat akar umbi) hanya mengetahuinya daripada laporan media dan terus membuat tafsiran sendiri.

"Bagaimanapun, jawatankuasa badan perhubungan Umno negeri turun padang untuk membuat penjelasan dan setakat ini saya sudah melakukannya di Pengkalan Chepa, Kota Bharu, Jeli, Tanah Merah, Rantau Panjang dan Peringat," katanya.

Beliau yang juga Menteri Pembangunan Usahawan, berkata jawatankuasa badan perhubungan Umno negeri dipecahkan kepada empat kumpulan bagi tujuan menemui ahli di peringkat akar umbi berhubung kekeliruan itu.

Katanya, pimpinan Umno negeri percaya keadaan akan berubah, berikutan penjelasan itu dan yakin ahli dapat menerima nasihat Dr Mahathir dengan hati terbuka.

Kelmarin, Setiausaha Agung Umno, Datuk Sabbaruddin Chik, berkata nasihat Dr Mahathir supaya tiada perebutan jawatan ketua bahagian dalam pemilihan bulan depan perlu dilihat sebagai satu pengorbanan demi perjuangan parti.

Katanya, pandangan itu bertujuan memantapkan parti dan tidak seharusnya dipandang ringan.

Mengenai dakwaan sesetengah pihak tetap ingin bertanding merebut jawatan ketua bahagian atas alasan tidak yakin dengan kepemimpinan sedia ada, Mustapa berkata sikap itu harus diketepikan.

"Dalam parti (ahli) harus ada disiplin dan keputusan (tiada pertandingan) sudah dibuat, maka kita harus mengakurinya.

"Oleh itu, mereka terbabit harus mengetepikan apa juga bentuk pandangan yang bertentangan dengan kehendak parti dan mengambil kira kepentingan bersama semua pihak.

"Seperti yang ditegaskan sebelum ini, apa yang dikatakan Dr Mahathir sebelum ini adalah satu arahan dan ia sewajarnya dipatuhi," katanya.

(END)